

四庫全書

史部

欽定四庫全書

史部

平定準噶爾方略正編卷

十九至  
二十一

詳校官監察御史臣孫家賢

通政使司副使臣莫瞻菴覆勛

總校官進士臣朱鈺

校對官編修臣周厚轅

謄錄監生臣汪瀾

欽定四庫全書

平定準噶爾方略正編卷十九

乾隆二十年秋九月丁酉

諭定西將軍扎拉豐阿等查辦巴哈曼集

上諭軍機大臣曰永常奏布庫努特得木齊諾爾布  
等昔稱帶領屬人來歸途中遇巴哈曼集搶掠殺  
傷等語巴哈曼集或係實在叛逆搶掠臺站或但  
不能約束其衆致多盜竊俱未可定著傳諭扎拉

豐阿玉保於到日查明如僅止盜竊仍行寬貸選  
派伊兵丁帶至軍前効力贖罪如實係從逆即將  
巴哈曼集擒拏正法安插其衆西路有似此反覆  
無定者俱酌量辦理具奏

命封厄魯特貝勒齊木庫爾為郡王賞銀一千五百  
兩貝勒普爾普銀一千兩貝子德濟特銀八百  
兩閑散台吉策伯克鄂爾咱特銀二百兩隨行  
宰桑二人各銀四十兩僕役二人各銀十兩

命賞給喀爾喀喇嘛諾顏綽爾濟封號

上諭軍機大臣曰喀爾喀喇嘛諾顏綽爾濟在阿睦爾撒納游牧誦經聞阿睦爾撒納之喇嘛楚魯木班珠爾以理阻止阿逆部衆不使逃竄諾顏綽爾濟即給與楚魯木班珠爾衣服以示獎勵并令其安撫衆人深知大義殊屬可嘉著加恩賞給清蘇朱克圖諾們汗之號其印信即入於辦理扎薩克印信內鑄給

戊戌

諭定西將軍扎拉豐阿等曉示巴雅爾沙克都爾曼  
濟前往游牧事宜

上諭軍機大臣曰現在諾爾布林心已擊敗阿巴噶  
斯是噶爾藏多爾濟游牧自無可慮惟巴雅爾沙  
克都爾曼濟雖各遣伊宰桑前往游牧此際尚未  
得信阿睦爾撒納人甚險詐恐煽誘伊等游牧亦  
未可定若伊等一抵軍營即赴游牧恐有不測著

富德明白曉示巴雅爾沙克都爾曼濟所遣宰桑  
若已向游牧察看情形迎來告知即令各歸游牧  
集兵會剿賊衆若尚未迎來伊等不必急赴致墮  
賊計或再遣人偵探或與噶爾藏多爾濟之兵同  
行方為妥協如此曉示看伊等意見語言若何即  
行具奏扎拉豐阿玉保亦傳諭噶爾藏多爾濟現  
在或由哈卜塔克拜塔克前往額林哈畢爾噶或  
由阿濟必濟前往巴里坤並如何與巴雅爾等會

合之處一併奏聞

申諭叅贊大臣哈達哈等進兵事宜

上諭軍機大臣曰阿蘭泰等奏臺站章京哈林送到  
貝勒剛多爾濟屬人鄂勒錐諾斯海及被搶臺站  
脫出官兵所告賊衆情形看來阿睦爾撒納惟就  
兵力稍弱之臺站肆行搶掠未敢犯我聲援及屯  
田兵丁伊之伎倆於此可見鄂勒錐所聞派兵搶  
掠將軍及伊蘇特鏗格爾有二千餘戶之語乃阿



睦爾撒納有意聲揚皆非實事伊潛逃踪跡必難  
遠去但速進兵即可擒獲哈達哈等仍遵節次諭  
旨俟丹津到時即與青滾雜卜喀喇巴圖魯阿玉  
錫帶兵前進達爾黨阿等隨後繼進以為聲援務  
期擒勦賊衆通信伊犁鄂勒錐等出使哈薩克歸  
途遇阿睦爾撒納被其拘禁仍能脫出深屬可嘉  
著交與哈達哈等量行賞賜其被擒臺站官兵以  
寡敵衆仍能脫出亦著加恩賞賚

命賞給齊木庫爾等戶口

上諭軍機大臣曰阿睦爾撒納所屬戶口內著撥出一百戶賞給齊木庫爾其納噶查所屬戶口著分賞普爾普德濟特二人前因克什克患病未來入覲令哈達哈等留心察看今伊兄普爾普已受朕恩克什克尚無可疑之處著傳諭哈達哈等毋庸防範再同班珠爾前來之喇嘛楚木齊班珠爾及阿睦爾撒納宰桑巴雅爾俱經阻止游牧人等逃

竄且與班珠爾之禪宗奇爾金阿睦爾撒納之額  
默根扎木叅之敦多克巴桑圖布慎俱已供出實  
情加恩釋放並著哈達哈等將伊等妻子查出遇  
便送至京師

命將阿睦爾撒納等游牧人衆分賞喀爾喀

上諭軍機大臣曰朕前諭將阿睦爾撒納班珠爾納  
噶查等屬人移於通肯呼裕爾今思沿途解送需  
派兵丁現在喀爾喀部落較從前頗知奮勉効力

著將阿睦爾撒納等游牧停其遷移除賞給齊木庫爾等人衆外所有戶口俱分賞喀爾喀等為僕即著兆惠策布登扎布查明人數均勻賞給仍令嚴加約束稍有滋事即行治罪毋得令其脫逃

庚子

命叅贊大臣哈達哈等籌辦軍營馬匹

上諭軍機大臣曰哈達哈等奏收取阿睦爾撒納游牧後未即發兵接濟額林沁多爾濟因兵少路遙

馬匹疲乏等語所奏甚屬含糊伊等前為收取阿睦爾撒納游牧奏留馬三千匹又將解送張家口馬一萬匹亦經奏留今所奏疲乏馬匹或指軍營附近者尚可若調來之馬皆久係收放餵養何以至於疲乏著伊等明白回奏仍查明現足數用馬匹即遵朕旨帶領哨探兵丁前進若馬匹臆分寶有不足即發銀兩緞疋向新收之烏梁海等購買應用亦可或路遠難應急需仍酌量辦理速為奏

聞

諭叅贊大臣哈達哈等停止辦理納噶查游牧

上諭軍機大臣曰詢問納噶查將阿睦爾撒納一切  
悖逆妄行之處據實供吐朕已施恩免罪仍留公  
爵著傳諭哈達哈等將納噶查及伊弟巴勒濟達  
克巴戶口俱停其辦理昨降旨將納噶查屬人賞  
給德濟特普爾普等今既給還著於班珠爾屬人  
內量為分賞亦傳諭兆惠策布登扎布等知之

諭叅贊大臣哈達哈等辦理布珠庫游牧

上諭軍機大臣曰哈達哈等奏郡王青滾雜卜報稱  
汗哈屯烏梁海宰桑布珠庫業已擒獲正法所有  
屬人或賞給察達克赤倫或給回莽噶拉克之處  
請旨定奪等語青滾雜卜此次辦理烏梁海奮勉  
可嘉近降旨令其帶兵同哈達哈前往哨探擒勦  
阿睦爾撒納通信伊犁若能奮勉効力必格外加  
以恩賞至莽噶拉克吉稱從前伊父身故噶爾丹

策凌將伊屬下二得木齊撤出給與布珠庫管理  
今布珠庫所屬若止莽噶拉克之衆即可給還若  
此外尚有屬人自應遵旨賞給察達克赤倫管理  
可傳諭哈達哈等詢問青滾雜卜令其分晰聲明  
具奏

諭領隊大臣富德傳信和碩特游牧人等

上諭軍機大臣曰訊據班珠爾供伊欲寫信付和碩  
特台吉三濟特鄂齊爾等令其曉示和碩特游牧



人等將阿睦爾撒納擒獻等語三濟特鄂齊爾業  
已起程班珠爾之信交伊宰桑禪宗齊往著傳諭  
富德俟禪宗到時將班珠爾之信交三濟特鄂齊  
爾轉送和碩特人等并將三濟特等言語情形奏  
聞禪宗已加恩授為散秩大世著帶往軍前聽候  
調遣

命獎賞宰桑厄爾錐音等

上諭軍機大臣曰朕前諭將永常所奏臺站情形一

摺錄寄玉保濟福等令傳諭帶往宰桑厄爾錫音  
哈薩克錫喇思克博羅特吞圖布等閱看今據奏  
稱伊等俱各繕書信安撫游牧並將書稿進呈厄  
爾錫音等誠心籌畫殊屬可嘉昨又將諾爾布林  
沁擊敗阿巴噶斯等一節錄寄扎拉豐阿傳示伊  
等量必更加踴躍今特加恩賞給御佩荷包及鼻  
煙壺各一件著扎拉豐阿等傳諭伊等祇受仍各  
賞銀二百兩以示獎勵

冬十月辛丑朔

命副都統莽阿納哈寧阿為西路領隊大臣

命拏解策楞來京革副都統三格職効力贖罪

上諭軍機大臣曰據策楞奏稱官兵器械須預備整齊隨同將軍進發等語策楞身獲重譴朕加恩賞給都統職銜命往西路理宜奮勉効力今伊觀望遲延毫無振作怯懦已極著扎拉豐阿一至軍營即傳旨將策楞拏解來京仍派員看守不得令其

自盡至三格雖非叅贊亦係領隊大臣一意推諉  
亦有應得之罪著革去副都統留軍營効力贖罪  
又

諭曰永常策楞奏薩喇爾遣探信之護軍莽哈前來  
中途被掠脫出尋至軍營將情形告知等語莽哈  
以隻身陷賊猶能脫出且所稱遇見賊衆俱四五  
十人一起並無大隊此又何足為懼策楞從前或  
為永常所惑不敢進攻今諾爾布林沁已擊敗阿

巴噶斯擒其得木齊班咱則朕前諭一到策楞即  
當帶兵尾追賊衆即隻身前往督率諾爾布林沁  
進攻有何不可伊身獲重罪朕格外加恩賞給都  
統職銜令在叅贊大臣上行走應如何奮勉乃一  
味推諉深負朕恩已降旨拏解來京治罪護軍莽  
哈被掠脫出奮勇可嘉著加恩授為藍翎侍衛賞  
銀一百兩揀派兵丁令其帶領探取伊犁信息即  
速奏聞

壬寅

命叅贊大臣哈達哈等拏解青滾雜卜來京

上諭軍機大臣曰哈達哈阿蘭泰等奏郡王青滾雜

卜請派兵五萬名於明年進剿等語從前因青滾

雜卜諸事迎合阿睦爾撒納曾經降旨拏問第因

其情尚可恕且當用人之際是以復諭停止以觀

後効今詢問阿睦爾撒納屬人供稱青滾雜卜將

班第薩喇爾叅奏之處通信阿睦爾撒納伊既從

中漏洩則聞其叛去心必惶懼現在所請派兵進  
剿之說亦非誠心効力不過藉此姑延時日若留  
伊辦事非惟不得其力轉須留心防範於事無益  
著哈達哈等仍遵前旨將青滾雜卜拏解來京其  
貝勒令伊子承襲所領和托輝特兵丁哈達哈等  
即酌派大員管轄

臣等謹案青滾雜卜既與阿逆潛通復敢請  
派多兵托言自効遲迴觀望其心叵測早蒙

聖明洞燭其奸是以

申諭軍營大臣仍遵

前旨拏解因傳

諭到時青滾雜卜先已派兵前進復

命哈達哈親至軍營詳察情形斟酌辦理我

皇上憐覆如天於萬無可原之中矜全再四冀其湔

滌自新乃竟冥心怙終狡馬逋竄甘心附賊

自速典刑於是益信反覆背



思者固為天理所不容而

聖主懲惡鋤奸斷自

宸衷者已歷歷先事灼見如此

諭定西將軍扎拉豐阿等派兵進勦事宜

上諭軍機大臣曰前曾降旨將此次出兵之台吉宰

桑兵丁等各加賞賚已諭知扎拉豐阿令其前至

軍營時即將現在派令出兵之噶爾藏多爾濟等

分別賞給厄魯特等生性貪饕聞有恩賞必至多

派兵丁須為限制計我兵五千餘名伊等再派兵  
五千名共得萬人已敷調遣扎拉豐阿即遵照辦  
理仍曉示各台吉宰桑所賞銀兩緞疋若攜帶進  
兵未免繁重或令游牧人等赴巴里坤支領或凱  
旋時再行支領議定即行奏聞

諭叅贊大臣哈達哈等進勦事宜

上諭軍機大臣曰哈達哈等奏稱九月十一日選派  
索倫喀爾喀兵丁令虛銜藍翎蒙固勒岱帶領自

庫卜克爾起程探取班第等信息等語哈達哈等較西路尚知奮勉所奏從四十八臺脫出之喀爾喀達瓦厄魯特巴顏等告稱隨從阿睦爾撒納人衆念其妻子羣相怨恨看此情形惟速帶兵進剿即可擒獲達瓦巴顏等被掠脫出著酌量賞賚至根敦扎卜負恩背叛情罪可惡將伊妻子近屬拏解來京其僕人分賞索倫喀爾喀等前命喀喇巴圖魯阿玉錫在哨探隊行走今哈達哈奏稱遣往

齊木庫爾游牧此際應已接奉諭旨即遵照前旨  
速赴軍營

命護理陝甘總督印務吳達善撥解軍需銀兩

上諭軍機大臣曰朕命厄魯特台吉噶爾藏多爾濟  
等帶領所部四五千人會同進剿應需賞賚銀兩  
緞疋著傳諭吳達善令其酌量或即於存貯哈密  
軍營銀十五萬兩內撥解五六萬兩至巴里坤交  
軍營大臣收貯行文扎拉豐阿聽其賞給其應貯

備軍需銀兩再於內地撥解前往

諭署安西提督冶大雄派送官兵事宜

上諭軍機大臣曰前據冶大雄奏准劉統勳策楞等  
扎調安西標兵二千名又續調各營兵二千名隨  
降旨將續調官兵停其派往其安西官兵業已進  
發不必停止嗣經冶大雄覆奏續據劉統勳等密  
札停止調遣因將先進官兵調取回營等語今復  
據永常等奏請派安西官兵一千名前赴軍營看

來伊等忽調忽停茫無定見徒使官兵往返馬力  
疲乏現在巴里坤有兵五千餘名足敷調遣著傳  
諭治大雄此時永常等所調官兵若已前往即赴  
巴里坤軍營駐劄如尚未起程即無庸派往

命喀爾喀貝子策卜登領兵前往伊犁

上諭軍機大臣曰永常策楞奏接到噶爾藏多爾濟  
等送交游牧書信已飭令策卜登交與諾爾布林  
沁其沙克都爾曼濟等七處書信因各游牧俱在

淖爾納林齋爾等處俟噶爾藏多爾濟到時再為  
送交等語辦理殊屬糊塗此等書信特為安慰伊  
等游牧自應隨到即行文送始於事有益何得遲  
留貽悞又伊等通信班第亦交策卜登令轉交諾  
爾布林沁托那噶爾布送往豈不能一同前去即  
此可見伊等怯懦性成毫無定見著策卜登等至  
諾爾布林沁處派厄魯特兵一百名同赴伊犁布  
圖庫若在伊游牧亦著同往并將沙克都爾曼濟

書信亦交策卜登設法傳送如諾爾布林沁處有便道可以交送即令派人分送其孥獲之阿巴噶斯屬下得木齊班咱著即妥協防範解送來京

甲辰

命授回人伯克阿底斯等官職

上諭軍機大臣曰管理伯得爾格鄂拓克回人伯克阿底斯著授為三品總管賞銀一百五十兩烏蘇卜阿卜都喇伊木俱著授為二等侍衛各賞銀一



百二十兩吐魯番回人伊必里野木著授為三等  
侍衛賞銀一百兩仍按伊等品級每人各賞衣一  
襲

丙午

申諭叅贊大臣哈達哈等查察青滾雜卜情形

上諭軍機大臣曰哈達哈等奏令郡王青滾雜卜同  
扎爾杭阿等帶兵追捕阿睦爾撒納等語朕因和  
托輝特兵尚可用曾將青滾雜卜暫停拏問近聞

其暗結阿睦爾撒納而所請明年派兵進剿之語  
顯係遲迴觀望是以仍令拏解來京但哈達哈等  
業已派令帶兵前進又復調回必生疑懼著傳諭  
哈達哈若接到拏問諭旨尚未舉行即速赴伊營  
留心察看倘誠心奮勉仍免其拏問將前旨及奏  
摺密封進呈若情形叵測哈達哈先酌定堪以管  
轄和托輝特兵衆之人即將青滾雜卜拏解來京  
此際最宜斟酌妥協詳慎辦理從前班第等奏

阿睦爾撒納伊尚聞知暗中通信今伊自知罪愆  
必多顧慮尤宜加意慎密

申諭叅贊大臣哈達哈等進勦事宜

上諭軍機大臣曰哈達哈等奏令郡王青滾雜卜等  
帶兵前進伊等亦陸續進發又據從臺站脫出人  
等告稱於銜格爾西喇托輝等處曾遇阿睦爾撒  
納等語看來阿睦爾撒納情形甚為窘迫若督兵  
速進自當擒獲朕已將分隊帶兵之處降旨伊等

自當遵照辦理阿睦爾撒納搶掠臺站時塔木集  
賽人等亦至額爾齊斯等處搶掠今大兵前往務  
將從賊黨羽悉力搜捕如塔本集賽等游牧更宜  
勦絕以壯軍威若能直至伊犁地方通信班第等  
併力夾攻固為甚善或須俟西路兵力即據形勢  
之地以待聲援相機進勦哈達哈等固不可稍存  
畏葸亦當計出萬全妥協辦理至從臺站脫出之  
喀爾喀及訥默庫巴圖博羅特等屬人勞悴可憫

哈達哈等即酌量賞賚以示鼓勵

申諭定西將軍扎拉豐阿等速赴軍營進勦

上諭軍機大臣曰今日永常策楞奏到尚未進兵前  
有旨令阿敏道帶領精兵採取班第等信息亦未  
遣行畏懦已極著傳諭扎拉豐阿玉保即速馳至  
軍營一應事宜俱遵節次諭旨辦理其務體委任  
之意加意奮勉以奏膚功

命授準噶爾諸部盟長

上諭軍機大臣曰前因都爾伯特部落人衆已分為  
兩翼各授盟長看來盟長一員尚屬不敷著將策  
凌策凌烏巴什訥默庫俱授為盟長並著塞卜騰  
為策凌之副策凌孟克為策凌烏巴什之副噶爾  
藏多爾濟為訥默庫之副輝特部落人既無多即  
著齊木庫爾為盟長和碩特部落著沙克都爾曼  
濟為盟長俱不必副

丁未

命封親王訥默庫之子喇嘛扎卜為貝勒加賞訥默庫銀一千兩宰桑巴圖濟爾噶爾烏察喇勒察罕鼐濟等銀各二百兩

定議籌辦西路軍營馬駝糧餉事宜

先是協辦陝甘總督劉統勳疏奏籌辦馬駝運送口糧撥貯兵餉各事宜得

旨軍機大臣議奏尋議據劉統勳奏稱臣前奏請調各處未用餘馬二萬匹合之現調哈密馬五千

餘匹及軍營所存尚可備用之馬其數約數七千官兵之用但其中恐有疲乏馬匹請將陝甘現存馬匹察其可用者一例調取至駝隻一項按冊尚存四千餘隻其中亦多不堪應用之駝現已行文撫臣購覓就附近營分派兵帶赴哈密聽候調用等語查此次用兵安接臺站追捕逸賊惟務迅速前行陸續進發哈密有馬五千四百匹既已先後送到軍營兩次運送巴里坤



糧石計駝一千三百隻俱足備一二千兵之用  
策楞等屢奉

諭旨自當即日帶領前進其續進之兵需用馬駝既  
據稱陝甘兩省原調未用餘馬尚屬臆壯即令  
護督吳達善尅期催赴軍營昨據吳達善奏稱  
已將肅鎮馬匹就近赴調先解軍營其餘分別  
臆分陸續起解其陝省路途稍遠各營馬匹應  
擇其臆壯者數千尅期前赴俱應交該護督分

晰查核辦理又軍營有駝一千三百隻續調安西駝一千隻應令該護督於各處駝隻調撥購買計足敷用即行停止又所奏運糧事宜請召募殷實商人分別程途險易給與雇值聽其陸續轉運應一併交與該護督辦理並派委賢能大員查催務期無悞其所請於蘭州司庫酌撥銀二十萬兩分貯甘肅安西道庫以備軍需亦應如所議行奏入

上從之

庚戌

命傳

諭準噶爾部衆

上諭準噶爾部衆曰準噶爾鄂拓克人等攻戰頻年  
互相殘害朕興師平定擒厥渠魁爾台吉宰桑等  
望風納款朕優加封賞并籌爾部衆生計俾各安  
居樂業今逆賊阿睦爾撒納負恩逃叛妄思并吞

爾衆肆行驚擾念爾各部豈有不願為天朝臣僕  
反附和亂逆甘受驅使之理特被其脅從無由自  
拔耳數年來令爾準部不得安生皆達瓦齊阿睦  
爾撒納所致達瓦齊已屬昏愚阿睦爾撒納尤為  
暴虐爾衆素所稔知朕今命將興師聲罪致討咨  
爾有衆能擒獲阿睦爾撒納者必加恩封賞以示  
獎勵此時甘心黨惡者不過阿巴噶斯哈丹克什  
木敦多克曼集數人其餘或為宰桑等挾制非其

本心有能擒獲從逆之宰桑得木齊等宰桑即行  
優叙得木齊即授為宰桑其餘屬人有著勞績者  
以次授職爾等當以受朕深恩永安生業為念毋  
為浮言煽惑倘執迷不悟大兵所至必加勦絕慎  
之

辛亥

命副都統富德為叅贊大臣兼理西路臺站  
命定邊左副將軍達爾黨阿等拏解青滾雜卜

上諭軍機大臣曰哈達哈等奏詢問厄魯特巴雅爾  
供稱青滾雜卜帶往烏梁海之諾爾布丹津係巴  
特瑪車凌之弟於七月內曾往見阿睦爾撒納其  
巴特瑪車凌所屬六十戶現在青滾雜卜軍營等  
語看來青滾雜卜必有通信於阿睦爾撒納之事  
是以令諾爾布丹津前往且查出巴特瑪車凌戶  
口亦未呈報前曾兩次降旨拏伊來京繼又中止  
倘伊知覺懷疑生懼愈滋事端著傳諭達爾黨阿

將青滾雜卜喚回拏解或令哈達哈即於軍前拏解來京其選派大員管理和托輝特兵衆及令伊子承襲貝勒之處俱遵前旨行

叅贊大臣哈達哈等疏奏解送台吉吹喇錫等來京

哈達哈等奏言據永貴文稱九月十八日管理聲援兵副都統扎爾杭阿遣員送到厄魯特台吉吹喇錫等查吹喇錫烏勒木濟係阿睦爾撒

納同族扎奇魯克齊他沙係貝勒扎木叅之人  
因阿睦爾撒納心懷叛逆曾告知喀爾喀王公  
等今帶領親屬二十餘人戶口一百餘人并在  
布拉罕察罕托輝等處遇見貝子德濟特扎奇  
魯克齊扎卜等三十餘口又從哈薩克逃出之  
厄魯特塞倫巴圖爾婦女畢齊罕扣等一俟前  
來吹喇錫即係根敦扎卜之父更有關係隨派  
虛銜藍翎瑪虎解送來京其家屬戶口暫行看



守又據吹喇錫等告稱伊戶口內有阿睦爾撒  
納屬人托博克哈爾布錫和通等三人恐其逃  
遁臣等現在嚴加看守其同來之德濟特屬人  
俱交各游牧安插奏入報

聞

壬子

命授巴哈曼集為二等待衛

上諭軍機大臣曰前據永常策楞奏往傳巴哈曼集

稱病不行未知虛實今策楞奏九月二十九日帶  
兵至廋濟地方巴哈曼集患病屬實昇之來見并  
稱欲令伊子沙喇巴圖魯隨營効力誠懇可嘉著  
加恩授巴哈曼集為二等待衛賞銀一百兩再臺  
站兵丁傳送事件甚屬勤勞而新附之厄魯特等  
尤宜撫卹著將派撥臺站之察哈爾喀爾喀等酌  
量賞給其厄魯特人等從優加賞

命寬免劉統勳策楞罪以司員在軍營効力

上諭大學士曰劉統勳因永常自穆壘退回巴里坤  
輕信浮言張皇附和奏請退守哈密拒絕歸附之  
諾爾布林沁種種乖謬不可枚舉是以降旨革職  
拏解來京治罪夫律以逗撓軍機搖惑輿情即置  
之於法實無可逭但朕念劉統勳所司者在糧餉  
馬駝其軍行進止原係將軍之事設令模稜之人  
緘默自全轉可不致獲罪是其言雖刺謬其心尚  
可原也况永常尚不識死綏之義何怪於懦弱書

生劉統勲在漢大臣中平日尚奮往任事朕於萬無可寬之中求其一綫可生子以自新之路劉統勲著從寬免其治罪發往軍營交班第等令其在司員內辦理軍需効力贖罪倘伊以為士可殺而不可辱欲來京甘受典刑亦惟其所自處伊子俱著釋放劉墉著加恩令在編修上行走自効至策楞去歲即以恆怯獲罪今復用為都統於永常送回時即當一面叅奏一面帶兵進勦乃一味曲從

依違觀望故亦降旨革職等因在伊實有應得之罪但此番坐失機宜永常實為罪首策楞乃係因伊獲譴亦著從寬免其治罪交與扎拉豐阿令其在司員內辦理糧餉効力贖罪

癸丑

命封賞喀爾喀扎薩克林丕勒多爾濟等

上諭軍機大臣曰喀爾喀扎薩克林丕勒多爾濟等於阿睦爾撒納逃竄時被其掩襲力戰得脫仍將

賊人後隊軍裝收獲奮勉可嘉著加恩將林丕勒  
多爾濟封為公賞銀一百兩其驍騎校齊克慎授  
為三等侍衛賞銀四十兩虛銜藍翎永德伍岱俱  
授為藍翎侍衛各賞銀三十兩並馳驛前往軍營  
効力行走訥默庫屬人諾斯海剛多爾濟屬人鄂  
勒錐亦各賞銀二十兩同林丕勒多爾濟遣回各  
游牧

定西將軍扎拉豐阿疏奏前赴軍營日期

扎拉豐阿奏言十月初三日欽奏

諭旨令臣與玉保速至軍營帶兵前進會合噶爾藏  
多爾濟等奮勉勦賊臣於烏里雅蘇台揀選馬  
駝於十月初五日輕騎起程追及玉保前往巴  
里坤約需二十餘日可抵軍營奏入報

聞

定邊左副將軍達爾黨阿等疏奏前赴軍營日

期

達爾黨阿等奏言臣等欽奉

諭旨至烏里雅蘇台辦理行裝即速前赴軍營今定  
西將軍扎拉豐阿於十月初五日前往西路臣  
等於是日即馳往北路軍營俟見哈達哈等公  
同商酌進兵事宜奏入報

聞

丙辰

申諭定邊左副將軍達爾黨阿等進勦事宜



上諭軍機大臣曰哈達哈等奏先帶索倫喀爾喀兵  
一千三百餘名進發達爾黨阿等將續進兵三千  
餘名分隊帶領前進等語哈達哈等此番辦理頗  
覺奮勉但前隊兵數較少尚未妥協或酌量揀選  
二三百名先行哨探達爾黨阿等即續進以作聲  
援方為慎重其兵丁口糧即於色沁牛羊內取用  
朕前曾降旨令北路之兵酌量在額爾齊斯或附  
近卡倫駐劄想伊等亦經奉到若勢可疾驅即行

前進但派令成衮扎布塔爾瑪善帶兵進發伊等  
選輒無能不如巴扎爾什第桑寨多爾濟尚能効  
力著即派令帶兵留成衮扎布等辦事喀喇巴圖  
魯阿玉錫丹津俱熟諳厄魯特事宜即會同商酌  
相機辦理

命授汗哈屯烏梁海宰桑郭勒卓輝等為總管

上諭軍機大臣曰哈達哈等奏據脫出之巴拜等供  
稱阿睦爾撒納遣尼瑪前往烏梁海宰桑郭勒卓

輝處通信會合等語汗哈屯烏梁海等係兵力收  
服非察達克車根赤倫等與賊有讐久經歸順者  
可比我兵既進伊等或襲其後甚有關係達爾黨  
阿哈達哈等宜加意防範再察達克等去歲投誠  
俱加恩授職此次收服宰桑郭勒卓輝瑪濟岱等  
著加恩授為三品總管賞給翎頂其餘宰桑有應  
酌量授為三四品總管者未經查奏著達爾黨阿  
等查明酌量授職一面奏聞一面辦理再伊等馬

匹牲隻若以銀兩緞疋與之交易既可分伊等之力亦藉以助給軍需即傳諭察達克等若能勉力承辦必加恩賞

命派兵赴達卜遜圖喇堵截賊衆

上諭軍機大臣曰富德奏稱額爾齊斯之北有達卜遜圖喇地方係準噶爾哈薩克俄羅斯交界其地產鹽輿圖所載額爾齊斯之北有鹽池即其地也距塔爾巴噶台千里阿睦爾撒納勢力窮蹙或由

此路逃往俄羅斯亦未可定著傳諭達爾黨阿哈  
達哈等帶兵進發後或令察達克赤倫等帶伊舊  
烏梁海兵數百名赴其地巡查堵截或於索倫兵  
內分數百人前往亦可伊等願往所派兵丁俱照  
軍營一體賞賚

定議派兵防守巴里坤事宜

先是協辦陝甘總督劉統勳疏奏派兵防守巴  
里坤一摺得

旨軍機大臣議奏尋議據劉統勳奏前奉

諭旨派綠旗兵二三千名令提督豆斌帶領防守巴

里坤以為聲援擬派甘州兵一千名肅州兵一

千名前往駐防等語查從前九月內奉

旨派兵其時永常尚駐穆壘兵俱隨征是以另派綠

旗兵丁防守嗣於十月內已傳

諭治大雄令其將現調安西兵二千名無庸前往惟

令該護督吳達善趨辦馬駝以應現在兵丁進

勒之用但巴里坤防兵僅三百名稍覺單弱請  
將原派安西兵內酌撥一千名前往駐防奏入  
上從之

叅贊大臣哈達哈等奏報九月二十日遵

旨將擒獲包沁總管阿克珠勒於軍營正法

平定準噶爾方略正編卷十九



欽定四庫全書

平定準噶爾方略正編卷二十

乾隆二十年冬十月丁巳

以解送達瓦齊至京遣官告祭

太廟

社稷行獻俘禮

戊午

上御午門樓行受俘禮奉

旨達瓦齊及伊子羅卜扎等俱著交理藩院候旨

申諭定邊左副將軍達爾黨阿等進勦事宜

上諭軍機大臣曰哈達哈等奏現在帶兵前進約於

一月內可到察罕呼濟爾等語阿睦爾撒納雖子

身逃竄傳聞在博羅塔拉地方會合彼處賊衆約

有三四千人若哈達哈等兵少輕進亦有可虞伊

等固不可恇怯退縮亦不宜冒昧嘗試著傳諭達

爾黨阿哈達哈等遵旨先遣精壯兵丁前行哨探

相機進止與西路會合共得兵四五千名即奮勇  
追勦務期弋獲又所奏遣往哈薩克之索倫跟役  
布顏圖傳哈薩克有出兵之信從前伊部落遣使  
前至軍營甚屬恭順茲復何由起釁或被阿睦爾  
撒納煽惑或布顏圖棄伊主逃回妄為捏飾俟送  
到時嚴行審訊既有此語達爾黨阿等應行知遣  
往哈薩克之侍衛德善令伊等暫時留待俟審訊  
明確再行遣往

命兆惠阿思哈分管北路臺站

上諭軍機大臣曰哈達哈等奏帶兵前進隨路安設  
臺站於撤回臺站兵丁及察哈爾兵內共挑選五  
百名辦給馬駝每臺安設十人現在兆惠富德俱  
經出差請另派大臣總管臺站等語軍行臺站關  
係緊要每臺十人尚覺單弱著於察哈爾兵丁內  
添派數百名每臺約以十五人為率昨經降旨令  
兆惠總理北路臺站今添派阿思哈所有隨營安

設臺站事務著阿思哈辦理其自烏里雅蘇台至  
張家口臺站著兆惠辦理

已未

諭定邊左副將軍達爾黨阿等派遣偵探兵丁事宜  
上諭軍機大臣曰昨因阿睦爾撒納屬人根丕勒協  
助坐臺台吉班第等鎗斃厄魯特甚屬奮勉又遣  
探賊信回報曾經降旨將根丕勒不必分賞喀爾  
喀送至察哈爾安插今思根丕勒誠心効力且正

在需人之際著加恩授為藍翎侍衛賞銀五十兩  
令其隨營効力或於哨探隊內差遣將伊妻子送  
往扎哈沁游牧暫行安插至哨探兵丁捉生取信  
必使賊人全無知覺為要若擒獲時有一二人逃  
脫則賊早已防備反為無益有損著傳諭達爾黨  
阿等嚴飭遣往各員務期全獲不得任其脫逃仍  
於索倫喀爾喀厄魯特內選派精壯兵丁前往

庚申

諭定邊左副將軍達爾黨阿等酌議會同西路進勦  
事宜

上諭軍機大臣曰哈達哈等奏瑪木特之收楞額訥  
默庫自伊犁脫出告稱班第薩喇爾等從哈什帶  
兵前來瑪木特亦由闐勒奇嶺前來隨派識路之  
人從哈卜塔克拜塔克往會瑪木特并行文西路  
等語哈達哈等所辦甚是訥默庫等既識路徑即  
在前隊作嚮導行走但詢得阿睦爾撒納現將噶

勒雜特人等遷往伊犁則北路進兵必無蹤跡且班第等既出西路自當由額林哈畢爾噶進兵噶爾藏多爾濟等游牧俱在此一帶亦可以接濟兵力朕意哈達哈等即將現有兵丁與噶爾藏多爾濟等由哈卜塔克拜塔克前往會同西路以壯軍威方為有益著傳諭達爾黨阿哈達哈等如噶爾藏多爾濟尚未前往西路伊等會同商議可否由阿濟必濟前往如屬不便毋庸拘泥若已經起程



即詢問識路之人一面帶兵前行一面送信與噶爾藏多爾濟於中途會合進勦其北路雖不需多兵可否約留千人交與阿蘭泰舒赫德於卡倫附近駐守伊等其悉心商議即行奏聞

命籌運烏里雅蘇台軍營米石

上諭軍機大臣曰哈達哈等奏現在烏里雅蘇台存貯米石及今歲可以運到米石共十二萬有餘足支官兵五六年之用等語此奏惟計算給發官兵

數目其接濟厄魯特等口糧並未籌及著交達爾  
黨阿哈達哈等於現在米石內除應給官兵數目  
外計一年之內應支給厄魯特等口糧需用若干  
即以今年成數為準通盤籌畫再行具奏並傳諭  
山西巡撫恒文等於今年採買米石數目減半豫  
備俟明年陸續運至軍營此項雖非急需亦不得  
過於遲滯

辛酉

命授策楞為叅贊大臣會同北路進勦

上諭軍機大臣曰策楞奏稱據達什達瓦屬人索諾木從伊犁脫出告知將軍班第等陷賊之信現在達什達瓦之妻率其游牧前來等語此信屬實必須會合兵力大為辦理昨降旨令達爾黨阿等同噶爾藏多爾濟帶兵前往西路會同進勦伊等諒已前進今聞阿巴噶斯哈丹等兵敗後潛匿山中策楞即帶兵與諾爾布林沁相見若其力可用即

會兵速進如少覺單弱則據守要害之地俟達爾  
黨阿等到日整頓兵力嚴行勦捕已諭總督方觀  
承等趨辦馬駝解赴軍營應用將來自必陸續得  
信策楞惟相機乘勢勿少退諉亦勿致冒昧前進  
方為妥協但此係索諾木一人之言達什達瓦之  
妻及軍營侍衛滿楚等尚未抵營或係逆賊造言  
惑聽亦未可定策楞尤宜加意偵探達什達瓦家  
口若至軍營即令在巴里坤居住令和起照管其

派出達什達瓦兵丁隨營進勦存留寧夏莊浪兵  
丁駐防各事宜俱照所奏行派出兵丁照現在進  
兵例賞給整裝銀兩外仍每名賞銀三兩并派散  
秩大臣阿雅勒虎揀選可用宰桑數員在軍營効  
力行走至索諾木所稱八月內敦多克曼集巴朗  
圖布慎會同喇嘛回人等作亂班第鄂容安被陷  
而薩喇爾帶兵百人為烏魯特宰桑納親哈什哈  
之子錫克錫爾格所困又伊犁之喇嘛等傳書達

什達瓦游牧阻其遷移各情節俱屬可惡策楞等  
進勦時務將此項賊人臨陣斬獲或擒拏解京治  
罪勿使漏網看來助惡者亦不過數人未必全行  
煽亂著派侍衛滿楚及陸續投來人內令其前赴  
伊犁曉諭衆厄魯特寬其脅從勸以反正有能擒  
賊自効者必格外加恩倘阿睦爾撒納已在伊犁  
即不必宣示惟整兵進勦速行擒捕以昭國法現  
在既有此信則從前發回班第等奏匣及節次諭

旨不必久候著扎拉豐阿策楞即行閱看相其緩  
急次第辦理策楞此次辦事頗知奮勉著加恩授  
為叅贊大臣給與副都統職銜扎拉豐阿未到時  
仍署理將軍事務並著傳諭扎拉豐阿知之

申諭定邊左副將軍達爾黨阿等會同西路進勦

上諭軍機大臣曰據策楞奏從伊犁脫出之達什達  
瓦屬人索諾木來告將軍班第等陷賊之信著將  
原奏及朕諭旨錄寄達爾黨阿哈達哈等閱看從

前北路進兵因未得伊犁信息且傳聞阿睦爾撒  
納尚在鏗格爾等處居住今既得此信且聞噶勒  
雜特人等俱為逆賊帶往伊犁自當於西路進剿  
著達爾黨阿哈達哈等遵朕昨降諭旨與西路會  
合由額林哈畢爾噶進剿至噶爾藏多爾濟入覲  
遣回賞賜頗多沿途必須防護伊等或帶兵同行  
或派兵千名交富德帶領前行如噶爾藏多爾濟  
業經起程伊等即帶兵隨後速進方為妥協



諭署陝甘總督方觀承等籌辦馬駝

上諭軍機大臣曰西路大兵現議進勦阿睦爾撒納軍行馬匹最要已節次傳諭該督撫等速為購買雖據吳達善奏派甘省營馬二萬匹但不妨寬裕籌辦若拘泥原數恐臨期轉不敷用著再傳諭方觀承等速於西安等處凡有產馬地方多為購買分起解送巴里坤軍營其有臆分稍次及此次揀剩收槽馬匹均須作速餵養務令壯健以收實用

至糧餉茶餉亦須寬裕籌備酌量馱裝車運陸續解送巴里坤聽候撥用

諭西寧副都統德爾素購辦馬駝

上諭軍機大臣曰現在大兵進剿阿睦爾撒納需用馬駝去年雖在青海採買為數無多著傳諭西寧副都統德爾素速往青海扎薩克游牧會同郡王索諾木丹津盟長等於各旗酌量採買即派伊等所屬官兵酌量由青海至巴里坤程途賞給路費

護送前往交與西路軍營聽候調撥其需用價銀  
即向西寧地方官支給務期多方購買速為馳送  
毋得因循推諉

訊問阿穆爾濟爾噶爾供詞

軍機大臣奏言臣等遵

旨訊問阿逆宰桑阿穆爾濟爾噶爾供稱阿睦爾撒  
納遣我迎接游牧人等約定在烏蘭托羅海或  
哈卜塔克拜塔克地方會齊如阿睦爾撒納已

往別處即將游牧人等往阿巴噶斯哈丹等游牧  
暫候總之今歲必在博羅塔拉過冬令我務必尋  
往後我至游牧時因阿睦爾撒納之妻不願即行  
要候班珠爾到時商議始定嗣班珠爾到日正欲  
商議逃遁已聞派兵將游牧馬羣收取旋被擒獲  
再阿睦爾撒納自擒獲達瓦齊後即有統據準噶  
爾之意雖與阿巴噶斯等商議尚未謀及衆人後  
撤兵至固勒扎始與衆台吉

宰桑等潛謀叛逆有葉克明安台吉察袞阻止  
阿睦爾撒納前來入

覲阿巴噶斯哈丹烏勒木濟等皆與同謀齊木庫爾  
普爾普等俱云

大皇帝恩不可負不宜妄動阿睦爾撒納並不聽從  
現在與阿睦爾撒納同黨者不過數人餘皆勉  
強服從聞阿睦爾撒納有移在穆素爾居住之  
言穆素爾在特克斯之西與布魯特回人交界

如遇大兵追捕窮蹙即擬投入回人境內至哈薩克雖與阿睦爾撒納和好但與額林沁仇隙甚深今阿睦爾撒納已娶額林沁之媳為妻以其孫為己子復聚塔本集賽庫圖齊訥爾等各鄂拓克牲隻資助額林沁向日被哈薩克擄掠之人哈薩克聞之必不能與伊和好至將軍大臣等參奏阿睦爾撒納之處郡王青滾雜卜私行告知我並無所聞惟聞有德勒克瑚畢勒罕

及尼爾巴羅卜藏策凌二人由瑪木特處聞信  
私自告知阿巴噶斯轉告阿睦爾撒納等語臣  
等將阿穆爾濟爾噶爾所供一一詢問納噶查  
情節約略相符奏入報

聞

叅贊大臣策楞疏奏扎哈沁迎候大兵情形  
策楞奏言臣於十月初六日前至扎哈沁交界  
正遇伊部落向內遷移臣即宣布

皇仁告以將軍永常將汝等棄置是以拏解治罪今特帶兵前來接應伊部落人等俱合掌跪告

大皇帝為我羣生發兵平定伊犁正欲安居樂業不意阿睦爾撒納叛逆阿巴噶斯哈丹復煽惑衆鄂拓克我扎哈沁人衆並不從賊聞將軍帶兵退回無所依恃將游牧向內遷移今蒙傳示

恩旨不勝感激且經將軍帶兵前來仍願各回游牧等語臣體察伊等情形頗屬實心即酌量賞賚



並將接設臺站派令嚮導等事面為指示又詢  
問宰桑鄂爾奇木濟各鄂拓克情形據稱倡亂  
之初雖各有搶奪而全部尚未驚擾惟布庫努  
特因伊宰桑敦多克曼集悖叛遂乘勢盜竊衆  
鄂拓克等語臣查現在從伊犁脫出之索諾木  
告稱敦多克曼集倡亂則布庫努特人等附和  
從逆是實臣即會同扎哈沁等兵衆嚴行勦絕  
奏入報

聞

參贊大臣哈達哈等疏奏遵

旨派遣扎木禪通信伊犁

哈達哈等奏言瑪木特之孫扎木禪於十月初十日帶兵百名前來臣等將奉到

諭旨宣示據扎木禪跪告我等投誠以來

天恩稠疊今又將我妻賞令完聚並賞給銀兩實屬感激難名情願帶兵前往伊犁臣等隨向扎木

禪挑取熟識哈卜塔克拜塔克路徑人等各給馬二匹駝一隻裹帶口糧齋捧

宣諭準噶爾人衆托忒字

勅旨仍派索倫喀爾喀官兵帶領於本月十二日起程前往奏入報

聞

癸亥

申諭定西將軍扎拉豐阿等通信進勦事宜

上諭軍機大臣曰昨據策楞奏從伊犁脫出之索諾木告知班第等陷賊之信朕心深為憫惻已傳諭策楞令其派侍衛滿楚等前往偵探並著從優賞賚期速得班第等實在情形益進勦烏合之衆原屬無難惟班第薩喇爾鄂容安因國事為賊所困每一思之不勝憤懣然亦未知虛實著扎拉豐阿玉保策楞等設法通信傳諭班第等以朕初意準噶爾危亂之餘甫經安定若屯駐大兵恐多驚擾

是以但命伊等駐劄辦事兵少力弱為賊所困非  
失守封疆可比伊等或相機脫出或忍死以待大  
兵方為大臣舉止若謂事勢至此惟以一身殉之  
則所見反小矣鄂容安素稱讀書人漢蘇武為匈  
奴拘係十九年全節而歸阿睦爾撒納固不足比  
匈奴我大清又豈漢時可及自當愛惜此身以圖  
後效恐伊等以失守罹罪不識大義遽爾輕生夫  
為人臣子若君父欲加之罪亦惟順受豈可豫料

而以一死為賢於生於心安乎朕今大興師旅陸續進發務期擒勦逆賊扎拉豐阿等務體朕憫惻伊等之心即會合各路大兵竭力勦捕俾逆惡知所懲創扎拉豐阿係蒙古人恐於助逆喇嘛有意寬假即玉保策楞亦稍存招撫之見俱斷不可行惟厄爾錫音哈薩克錫喇因入覲前來其屬人或被脅從尚可詢問伊等分別勦撫其餘俱不得少存姑息致反覆叛亂無所底止

臣等謹按班第鄂容安當阿睦爾撒納逆跡乍萌屢奉

密旨

命以便宜從事其時誠燭其詭言入

覲之狡謀操刀必割則殲厥渠魁可以為國除兇而不徒以捐軀完節此因循顧慮坐失事機有不能不為二臣惜者然

聖主愛惜人材

仁至義盡一聞伊犁竊發即

諄諭軍營大臣接臺通信且

命傳

諭班第等毋僅以一死塞責而班第等以世受

國恩慷慨死綏義不苟活是以始聞被困猶望其

生全及引決自裁更上勤

憫惻所以示萬世勸忠之道曷以加哉

甲子



叅贊大臣策楞疏奏諾爾布林沁等遣使迎候  
及詢問伊犁情形

策楞奏言十月初九日據遣往傳示諾爾布林  
沁之千總策卜登告稱諾爾布林沁與扎那噶  
爾布因葉克明安台吉察袞德濟特叛附阿睦  
爾撒納相持力戰未即就擒已獲察袞之子達  
爾扎遣宰桑諾爾布齊木布來見臣詢問諾爾  
布齊木布告稱諾爾布林沁擊敗阿巴噶斯哈

丹之後即欲整兵進勦而塔本集賽復與阿巴噶斯哈丹相合且察袞德濟特俱為同黨占據險阻是以未能全勝恐其夾攻已將游牧暫移於都爾博勒津之地阿巴噶斯等現於圖古里克等處拒守等語又伊犁叛賊克什木敦多克曼集及喇嘛等遣布魯古特台吉納旺送付額林哈畢爾噶等處台吉宰桑等書信為扎那噶爾布之屬人濟爾噶爾所獲并原書呈送前來

臣隨詢問納旺供稱係鄂勒吹鄂羅什虎之子  
達瓦齊殺害我父因我於阿巴噶斯鄂拓克將  
軍薩喇爾進兵時帶往伊犁遣取回人貢賦八  
月二十三日宰桑克什木搶掠臺站將軍班第  
等遣敦多克曼集安撫衆心二十四日將軍大  
臣等帶兵沿河向空吉斯行走我並未隨行二  
十九日宰桑巴桑向衆云宰桑克什木敦多克  
曼集烏克圖圖布慎巴朗及喇嘛回人等率衆

前至烏蘭庫圖勒圍守將軍大臣正在搶掠班  
將軍鄂叅贊俱行自盡薩將軍由小路帶達什  
達瓦兵百人脫出三十日敦多克曼集令我傳  
書於額林哈畢爾噶各台吉宰桑九月初八日  
至哈丹鄂拓克見阿巴噶斯又令我探聽諾爾  
布林沁之信我尋山路前來即被擒獲前在哈  
丹鄂拓克時聞薩將軍為烏魯特宰桑納親哈  
什哈之子錫克錫爾格所獲送往伊犁臣復嚴

詢納旺敦多克曼集更有何事交付阿睦爾撒  
納現在何處據稱在伊犁時敦多克曼集恐薩  
將軍由吐魯番脫出已遣兵阻截哈丹帶兵二  
百名至烏隆古尋阿睦爾撒納並無蹤跡臣伏  
思納旺所供伊犁情事恐係詭計揚言煽惑自  
應帶兵速進擬即日輕騎往會諾爾布林沁共  
商進勦事宜又塔爾巴噶沁台吉唐古特率五  
百餘戶來降現住諾爾布林沁游牧遣其得木

齊俄羅斯前來又呼爾璪台吉達瓦及察哈甲  
勒鄂拓克俱遣使前來達瓦前為阿巴噶斯所  
迫搶掠入

觀台吉噶爾丹達爾扎濟克濟扎卜等今俱送至軍  
營謹將台吉噶爾丹達爾扎濟克濟扎卜令副  
章京德明保押解赴京其納旺達爾扎及前次  
拏獲之班咱一併解京奏入

上諭軍機大臣曰策楞奏擒獲台吉納旺所供伊犁

情形並輕騎往會諾爾布林沁商議進勦所辦俱合機宜策楞會同諾爾布林沁時即將阿巴噶斯哈丹游牧奮勇勦捕其牲隻分給兵丁老弱賞給諾爾布林沁此際更宜偵探阿睦爾撒納如前至伊犁策楞等即拒守要害候北路大兵與噶爾藏多爾濟到時併力進勦若逆賊尚無蹤跡策楞等即整頓兵力直抵伊犁勦捕賊黨然亦須量力前進不可輕忽前因未得伊犁信息因令扎拉豐阿

暫駐額林哈畢爾噶今事勢如此扎拉豐阿自應  
同哈達哈策楞玉保等前進其安撫游牧辦理臺  
站各事宜著達爾黨阿雅爾哈善帶兵繼進以作  
聲援富德仍遵前旨巡查臺站策楞並傳諭諾爾  
布林沁伊少年奮勉朕甚嘉悅已封為郡王此次  
進勦有功必加重賞扎那噶爾布亦知奮勉著封  
為貝勒賜雙眼翎擒獲納旺之濟爾噶爾賞給孔  
雀翎并銀五十兩擒獲達爾扎之人著查明賞銀



五十兩嗣後有應行加賞者策楞即酌量賞給策楞自知前譴勇往任事著給與都統職銜仍以參贊大臣行走并傳諭扎拉豐阿知之

恩加宰桑厄爾錐音等世職

上諭軍機大臣曰昨玉保奏中途出痘之宰桑哈薩克錫喇吞圖布等留於臺站照看仍帶厄爾錐音等起程今至努空西喇臺站厄爾錐音鄂哲特亦皆出痘玉保先行留烏爾登在途照看等語聞伊

等痘疹輕稀自易痊好且嗣後來京更無他慮益覺可喜著加恩賞給厄爾錐音哈薩克錫喇騎都尉世職恩克博羅特吞圖布鄂哲特雲騎尉世職聽伊等指出子弟承襲此際須寬心調養俟全愈後從容行走勿稍勉強烏爾登善為照看頗知悔過奮勉著授為頭等侍衛仍將各宰桑等身體平復日期速為奏聞

諭叅贊大臣富德曉示沙克都爾曼濟通信游牧事

宜

上諭軍機大臣曰現據索諾木所告伊犁信息阿睦爾撒納大約前往伊犁沙克都爾曼濟若遽回游牧恐有他變且伊游牧人等尚未知伊領兵前往或啟猜疑亦未可定若由回人路徑前往安慰伊游牧人等由彼處派兵堵截阿睦爾撒納會合大兵似更妥協朕已密派侍衛等傳諭回人霍集斯伯克令其堵勦逆賊著傳諭富德曉示沙克都爾

曼濟派伊親信宰桑二人傳示游牧派兵堵截  
相機前進伊等仍同將軍大臣進兵夾攻於軍事  
甚有裨益富德即遵旨曉示仍將伊意見言語如  
何及派出宰桑所付書信即行奏聞此事最宜慎  
密自噶爾藏多爾濟等台吉外勿使他有漏洩

乙丑

諭叅贊大臣策楞曉示唐古特通信額林沁事宜  
上諭軍機大臣曰策楞奏稱塔爾巴噶沁台吉唐古

忒遣宰桑鄂羅斯率五百餘戶來歸并將臺站被掠之察哈爾喀爾喀等送回等語唐古忒誠悃可嘉著加恩封為貝勒賞給雙眼翎策楞俟伊來見時即傳旨獎諭再台吉額林沁從前阿睦爾撒納曾殺害伊子外雖相依心必不合唐古忒若能通信額林沁俾擒獲逆賊不但藉復前讐更使身邀恩賞如力不能辦即令其束身來歸亦當施恩封賞策楞將此傳諭唐古特令其盡心辦理以期承

受朕恩如通信額林沁時其書詞大指告以阿睦爾撒納與阿布賚久相和好而額林沁從哈薩克逃出時曾傷害多人阿布賚甚懷憤恨今阿睦爾撒納欲將額林沁擒送哈薩克以修好此係詢問和碩特台吉納噶查所告之詞其言必非無據額林沁自知與阿睦爾撒納有隙且與哈薩克不和伊亦閱歷有年豈不預防禍害若令其將阿睦爾撒納擒拏既可復讐免患且可承受恩賞策楞即

傳諭唐古特將此意作書開導額林沁并將唐古特言語情形奏聞再現在軍前新附頗多兵勢自當振作若得阿睦爾撒納未往伊犁之實信即可速行進剿蓋以噶爾藏多爾濟與恩克博羅特等頗重待喇嘛若會同進兵將助惡喇嘛擒剿恐伊等拘泥習俗少覺掣肘惟於未到時能先示懲創庶合事機又如辦理喇嘛一事昨命全行勦滅今思蒙古厄魯特俱重黃教亦宜分別辦理倘實係

助惡臨陣仍復抗拒自當誅戮其擒獲者俱解送  
來京老弱量從寬宥并將喇嘛係出家人不守清  
規好亂生事是以特為整頓明白曉示俾衆共知  
其罪無可逭併傳諭扎拉豐阿玉保知之

命台吉吹喇錫烏勒木濟前往西路軍營

上諭軍機大臣曰哈達哈等解送阿睦爾撒納近族  
台吉吹喇錫烏勒木濟到京詢非賊人黨羽人亦  
可用著加恩各賞銀三百兩衣一襲仍交瑪虎帶



回俟達爾黨阿等到西路軍營時酌量調遣伊等  
妻子不必送往察哈爾即在鄂爾昆塔米爾等處  
居住其扎木叅所屬之他沙阿睦爾撒納屬人托  
博克哈爾布錫和通仍著解送來京

命授和通鄂勤等為扎薩克頭等台吉

上諭軍機大臣曰富德奏稱帶領前往軍營之台吉  
和通鄂勤琿齊與伊等父兄分居所領各有一百  
餘戶等語從前報明戶口時因伊等父兄應封爵

秩僅授和通鄂勤等為閑散台吉但和通鄂勤之  
父巴圖爾額默根應封貝子琿齊之兄諾海奇齊  
克應封公俱未經入覲不便封爵伊等既與父兄  
分居現在從軍効力著加恩俱授為扎薩克頭等  
台吉賞給孔雀翎并傳諭噶爾藏多爾濟等進兵  
之時伊等父兄投來即奏聞封授惟是厄魯特等  
貪求無厭今用兵之際富德既有此奏自當加恩  
鼓勵將來相繼干求若一一代為陳奏必開僥倖

之端此風斷不可長並傳諭富德等知之

定議陝甘兩省辦理馬駝事宜

署西安巡撫台柱甘肅巡撫吳達善疏奏辦理  
馬駝二摺得

旨軍機大臣議奏尋議台柱奏稱陝西撫標應解馬  
一百三十六匹督標應解馬一千七百三十四  
惟挑出堪用馬七百餘匹已向將軍都賚面商  
將滿營堪用馬三千匹內先行借撥督標解送

又稱現在各屬採買大率馬少騾多近省州縣  
已共得馬騾一千七八百餘匹離省稍遠州縣  
陸續買報大約可至二千數百餘匹現在尅期  
起解等語查前據劉統勳奏報陝省督撫提鎮  
各標共調馬七千匹今督標既止堪用馬七百  
餘匹而滿營現有堪用馬三千匹即可行文將  
軍照數撥解何必復稱借撥至騾頭一項前經  
議覆劉統勳奏令其無庸購買今既已購買騾

頭雖不足應付軍行而驛站馱載自屬可用現據大學士黃廷桂奏抽撥驛馬俱係簡僻之驛無須撥補其沿邊衝途及邊口臺站差務繁多即將此項驛頭分撥協濟於驛務亦屬有益吳達善奏稱駝隻一項軍營現有駝二千三百隻又甘省提鎮解送及各州縣購買共一千二百七十餘隻誠恐哈密糧運仍有需用現在行知軍營酌量數目移知即行文兩省將已經購買

駝隻解肅備用其未經購買者即行停止等語  
查本月內議覆劉統勳奏除軍營現有駝隻外  
再於各處挑選并行文兩省及沿邊購買備用  
今吳達善奏州縣買得之數合之軍營現有之  
數僅及三千五百七十餘隻大兵進勦需駝正  
多計此際軍營必將需用實數移知該督等應  
令該督等於實數之外仍行購買務期有贏無  
絀以利軍行至所奏派調堪用馬匹約計月內

可全令出關其贍分不及者即以撥補安西各營摘缺之數及撥運巴里坤糧石已據安西道文綬雇覓商人牲隻并於所存疲駝內挑選馱運均應如所奏行奏入

上從之

丙寅

命達爾黨阿掌定邊右副將軍印領兵前往西路哈達哈掌定邊左副將軍印仍留北路軍營

上諭軍機大臣曰朕前降旨令哈達哈等帶兵會合西路今思北路厄魯特游牧及新降汗哈屯烏梁海等既須彈壓烏里雅蘇台存貯糧石甚多亦應防守西路既有兵六千現須豫備馬駝自不便更加籌辦哈達哈等所領兵三千名應仍留北路惟令達爾黨阿帶兵一千或數百名同噶爾藏多爾濟前往西路合之扎拉豐阿玉保富德等陸續帶往兵丁八百名統計西路兵已及八千名足敷調



遣惟馬匹最宜多備若將哈達哈等所調翁金達  
什和碩阿西克托里等處馬匹挑選二三千由相  
近岔道解往應用更屬有益如繞道遠行亦可不  
必哈達哈仍遵前旨於北路駐劄以作聲援并令  
喀喇巴圖魯阿玉錫丹津帶領精兵千名以內前  
行哨探如遇阿逆由北路逃遁即相機勦捕如此  
兩路進兵較為周密哈達哈既專辦北路即掌定  
邊左副將軍印雅爾哈善在叅贊大臣上行走達

爾黨阿往西路時掌定邊右副將軍印若薩喇爾  
前來即行移交仍在叅贊大臣上行走其烏里雅  
蘇台大臣印著阿蘭泰管理伊等務公同商酌隨  
宜辦理勿但知奉行成命以副委任

命封授達什達瓦之妻車臣默爾根哈屯名號

上諭軍機大臣曰達什達瓦之妻因伊犁擾亂並不  
聽從彼處衆喇嘛等之言帶領游牧人衆前來投  
順誠悃可嘉著封授車臣默爾根哈屯名號派副

都統鄂實齋粧蟒緞十足銀五百兩茶葉一千勛  
前往賞賚鄂實至巴里坤後即赴扎拉豐阿處隨  
同辦事在領隊大臣上行走

丁卯

訓諭軍營將軍大臣等

上諭軍機大臣曰今春大兵平定伊犁時兩路將軍  
大臣等未免各存意見不能和衷共濟此皆扎拉  
豐阿哈達哈達爾黨阿玉保策楞等稔悉但彼時

因逆賊阿睦爾撒納從中交搆致啟猜疑此次進  
兵皆我國家親信大臣又皆由西路進發辦理諸  
事朕俱逐一指示務期同寅協恭略去形跡公爾  
忘私則國事有濟而伊等之勲勞亦著倘仍懷挾  
私意妄分爾我自不能逃朕洞鑒著傳諭軍營將  
軍大臣等加意奮勉力洗積習勿為噶爾藏多爾  
濟等所笑

命散秩大臣普爾普前往西路軍營在哨探隊內行

走

戊辰

諭侍郎兆惠等辦理阿睦爾撒納等游牧事宜

上諭軍機大臣曰據兆惠等奏遵旨將阿睦爾撒納

班珠爾等游牧人衆分別賞給齊木庫爾德濟特

普爾普其餘俱賞給喀爾喀惟將阿睦爾撒納宰

桑吹扎卜暫行看守其餘宰桑亦分賞喀爾喀等

語吹扎卜既為阿睦爾撒納所信用自不便仍留

游牧著將伊妻子一併解送來京其餘宰桑達瓦等十八人俱賞給喀爾喀亦未妥協著同查出扎木叅之宰桑等併其妻子俱交與侍衛奇徹布解送來京昨台吉吹喇錫送到時朕加恩將伊子根敦扎卜及所屬俱行給還此奏內根敦扎卜戶口若係逃竄之根敦扎卜即賞給喀爾喀若係吹喇錫之子仍遵旨給還又班珠爾之寡姊及伊前妻俱不必送京仍交與烏勒木濟管轄班珠爾同族

台吉敦多克達什唐拉扎卜特默齊俱不必辦理  
仍令照舊居住游牧其餘查出馬匹軍械交與烏  
里雅蘇台軍營大臣查收

己巳

諭都爾伯特台吉伯什阿噶什回部頭目阿卜都伯  
克擒送阿睦爾撒納

上諭伯什阿噶什曰準噶爾內亂頻仍各部落人衆  
失其生業甚屬困窮朕為統一天下之主懷保羣

生無分中外是以特發大兵平定伊犁方欲施恩定制永安反側乃逆賊阿睦爾撒納潛謀叛逆妄思併吞諸部肆其暴虐形跡敗露畏罪潛逃朕已命將窮追務期弋獲爾台吉輸誠歸命前經將軍大臣陳奏定於明年入覲今逆賊一日未獲爾諸部一日不得安生爾能仰體朕旨去逆効順或派兵協勦阿睦爾撒納或俟其來投爾游牧擒獲解送朕必大沛殊恩今特命和碩特台吉公納噶查



前來傳諭爾其欽承奮勉自効又

諭阿卜都伯克曰爾回部原係吐魯番舊屬今年春  
大兵平定伊犁達瓦齊逃往爾游牧爾能擒獲及  
其眷屬解送軍前將軍大臣等奏報朕已加恩賞  
賚又定於明年入覲再沛殊恩今逆賊阿睦爾撒  
納妄思併吞諸部狡謀敗露畏罪潛逃朕已命將  
窮追爾雖不必派兵協勦但須豫飭游牧伺察防  
守若阿睦爾撒納逃竄至爾游牧時擒獲解送朕

必重加爵賞茲特命和碩特台吉公納噶查傳諭  
并齎賜物爾其領悉

申諭署陝甘總督方觀承等辦解軍營馬匹

上諭軍機大臣曰駐劄巴里坤寧夏將軍和起奏安  
西及內地撥解馬匹均未送到俟到日即將索倫  
兵料理進發等語此次進勦兵丁利在迅速策楞  
已帶兵前進後繼尤不可稍遲看來管解馬匹雖  
派有將領仍須大員專司催督署總督方觀承此

時諒已抵肅著傳諭令其駐肅料理馬駝糧餉事  
務甘肅巡撫吳達善著來往稽查專司催送馬駝  
速抵軍營固不可稍有遲延亦不得因有此旨將  
馬匹過於疲頓有悞軍行

平定準噶爾方略正編卷二十

欽定四庫全書

平定準噶爾方略正編卷二十一

乾隆二十年冬十一月庚午朔

諭定西將軍扎拉豐阿等擒賊事宜

上諭軍機大臣曰阿睦爾撒納人甚奸詐此際或遣人前來或力窮詐降俱未可定如遣人前來即行擒獲或有所奏俟解到時訊問即伊自知罪譴恐懼來降亦斷不可信務將伊拏問解送京師以彰

國法將此傳諭扎拉豐阿等知之

諭定邊左副將軍哈達哈等駐兵防範事宜

上諭軍機大臣曰哈達哈等奏據喀喇巴圖魯阿玉錫稟稱現屆天寒不宜進兵衆厄魯特等惟冀倣倖成功不可全信等語此語尚合機宜朕前命達爾黨阿帶兵前往西路北路無庸進兵惟令哈達哈雅爾哈善領兵防守或派兵數百名捉生探信相機辦理著仍遵前旨行再烏梁海宰桑鄂木布

博郭勒遣孟克什來報阿睦爾撒納宰桑尼瑪遣人至鄂木布等處告以阿逆現在領兵侵擾蒙古令其出兵協助等語量阿睦爾撒納斷無此等餘力但既有此言亦不可不豫為防範又此等烏梁海係新降之人心懷叵測首鼠兩端尤宜加意密防今既來報信即當加恩獎勵著賞宰桑鄂木布博郭勒緞疋銀兩所遣之人亦著酌量賞給其擒獲葉克明安台吉察袞屬人阿穆呼朗到日即派

員解送來京餘俱照所奏正法其妻子賞給喀爾喀等為奴

恩賞前往阿克蘇城宰桑兵丁銀兩

上諭軍機大臣曰厄魯特公納噶查侍衛官長保等帶領額敏和卓回人及達什達瓦兵丁前往阿克蘇城額敏和卓回人甫回自伊犁達什達瓦兵丁亦從游牧初到今復派往阿克蘇城雖非進兵可比但係遠行著加恩於應得口糧外宰桑每員給



銀二十兩兵丁每名給銀十兩令其寬裕整裝並  
著和起曉諭額敏和卓及達什達瓦之妻務揀選  
諳練宰桑管轄兵丁妥協前往

命封額敏和卓為鎮國公

上諭軍機大臣曰前額敏和卓帶領回兵直抵伊犁  
甚屬奮勉今復派伊所屬兵丁前赴阿克蘇城著  
加恩封額敏和卓為鎮國公以示獎勵

辛未

命貝勒塞卜騰為北路叅贊大臣

上諭軍機大臣曰都爾伯特王貝勒等前經領兵前赴伊犁是以令伊等回至游牧暫息現在擒拏阿睦爾撒納亦未派往今烏里雅蘇台無通曉厄魯特情形之人貝勒塞卜騰前在叅贊大臣上行走甚屬奮勉著派伊屬下兵丁或百名或五十名仍授為叅贊大臣前赴烏里雅蘇台協同哈達哈等辦理一應事務應給俸餉及兵丁口糧已降旨哈

達哈等辦理如欲將戶口一併帶往即准其帶往  
仍賞銀三百兩令其整裝又

諭曰汗哈屯烏梁海等報稱阿睦爾撒納誘伊等同  
來侵擾蒙古明係揚言以聳聽聞然或揣度西路  
進兵北路無備前來滋擾亦未可定宜先時設備  
使叛賊不得逞其詭計哈達哈等現領兵三千名  
此外烏里雅蘇台兵丁甚多米糧亦甚豐裕著合  
為一萬分駐烏里雅蘇台軍營及哈達哈等所據

形勝之處以為聲援第以預備進兵為言不必宣  
露防禦阿逆前來之意使賊聞風退避再都爾伯  
特貝勒塞卜騰與阿睦爾撒納有讎前在軍營行  
走頗著勞績仍命為叅贊大臣前往北路軍營協  
辦事務一應事宜哈達哈等與伊公同商議奏摺  
內一體列名至添兵豫備之處未經諭塞卜騰知  
悉哈達哈等亦不必轉諭此非疑伊恐其屬人漏  
洩於事無益著密諭哈達哈等知之

叅贊大臣玉保疏奏領兵由巴里坤起程日期  
玉保奏言臣帶領噶爾藏多爾濟沙克都爾曼  
濟之宰桑車木布等於十月二十日至巴里坤  
軍營即帶索倫察哈爾兵丁五百名於二十二  
日自巴里坤起程前往額林哈畢爾噶會同進  
剿奏入報

聞

壬申

定議調遣羅卜藏多爾濟兵丁事宜

軍機大臣等奏言厄魯特貝勒羅卜藏多爾濟願派兵五百名前往巴里坤聽候調遣臣等查西路軍營現在各路兵丁共計八千名所需馬匹俱已籌辦此項羅卜藏多爾濟兵丁五百名馬匹尚未籌及若即發往巴里坤徒致守候若俟需用之時由將軍等奏到後再行調遣已屬遲悞臣等議令羅卜藏多爾濟即回游牧選兵

五百名豫備調遣仍行文扎拉豐阿等如需用  
羅卜藏多爾濟兵丁調遣即先將各處送到馬  
匹通盤核算足供乘騎即知會羅卜藏多爾濟  
緩行先赴巴里坤俟至巴里坤日羅卜藏多爾  
濟賞銀三百兩兵丁各賞銀十兩令其整裝前  
進奏入

上從之

癸酉

命策楞為定西將軍扎拉豐阿為定邊右副將軍達爾黨阿為叅贊大臣籌辦進兵伊犁事宜

上諭軍機大臣曰據策楞奏稱喀爾喀貝勒車木楚克扎布台吉唐古忒宰桑鄂爾奇木濟將叛逆宰桑敦多克曼集鄂拓克之得木齊沙喇勒岱等五得秦游牧勦滅扎那噶爾布諾爾布林沁又將布庫努特三得秦游牧盡行殺戮等語此次辦理俱甚妥協現在領兵前進務期擒拏阿巴噶斯哈丹



等解京治罪並將伊游牧勦滅以振軍威此時兵力甚盛策楞即會同諾爾布林沁扎那噶爾布唐古忒等進取伊犁如阿陸爾撒納已據伊犁恐兵力不足仍遵前旨俟噶爾藏多爾濟等到時整頓大兵同進斷不可冒昧輕試至唐古忒自伊犁力戰而出理應加恩恐衆人不知妄思恩澤著策楞派侍衛一員至伊游牧傳諭加恩即從巴里坤支銀一千兩賞給所有勦滅布庫努特之受傷人員

並著策楞酌賞以示鼓勵仍咨部議叙侍衛滿楚所稟豫報阿睦爾撒納謀叛之伊犁回人策楞到彼即查明賞賚策楞自知前譴奮往從事悉協機宜額林哈畢爾噶等處共知其為將軍不便更替著即授為內大臣兼定西將軍扎拉豐阿著授為定邊右副將軍即將達爾黨阿帶往之印給與掌管駐劄額林哈畢爾噶辦理軍務達爾黨阿著授為叅贊大臣同伊辦事玉保隨將軍策楞帶兵前

進伊等同心協力擒勦逆賊搜捕黨羽總期於事  
有濟共奏膚功無將軍叅贊之分策楞等其仰體  
朕意以副委任策楞著加恩賞銀一千兩伊子特  
通額已施恩免罪授為三等侍衛並著隨往軍前  
効力

命安撫達什達瓦游牧人衆

上諭軍機大臣曰據策楞奏達什達瓦之妻遣宰桑  
薩喇爾族弟哈柳侍衛滿楚等告稱自伊犁前來

兩次遇敵衝突率領屬人來歸等語達什達瓦之妻深知大義率領屬下棄賊來歸深屬可嘉昨已遣副都統鄂實傳旨將達什達瓦之妻賞給名號並賜以銀兩緞疋著和起仍照前旨辦理并令在巴里坤附近過冬俟明年向阿爾台地方遷移居住侍衛滿楚奮身脫出著授為二等侍衛宰桑哈柳護送薩喇爾之子玉魯斯前來亦著加恩授為藍翎侍衛仍照哈柳所請明年前往薩喇爾游牧

察哈爾地方居住

命免治和托輝特郡王青滾雜卜罪

上諭軍機大臣曰前因阿睦爾撒納宰桑阿穆爾濟爾噶爾告稱班第薩喇爾叅奏阿睦爾撒納之時清滾雜卜私告阿睦爾撒納以致潛逃朕因降旨拏問令其質對今阿穆爾濟爾噶爾已經正法無從質對即青滾雜卜果有此事亦不過一時愚昧伊因與阿逆同在一處恐一併叅處私相告語初

不料阿睦爾撒納之奸惡至於此極也即如色布騰巴爾珠爾信阿睦爾撒納之言代為陳奏色布騰巴爾珠爾豈有附逆之事此皆伊等不知事體受其愚弄耳青滾雜卜自去年領兵以來甚屬奮勉從前罪愆著加恩寬免伊能感戴朕恩勿稍疑懼益加奮勉朕尚將施恩封為親王此際如已拏問即傳旨釋放如未拏問即可無庸辦理將此傳諭哈達哈知之

甲戌

申諭叅贊大臣達爾黨阿等分路進剿事宜

上諭軍機大臣曰據哈達哈等奏各隊兵丁於緊要隘口駐劄伊等於布延圖地方過冬俟明年草萌之時會兵額爾齊斯併力進剿等語哈達哈所奏尚是但由北路進兵路較遠而部落亦少由額林哈畢爾噶進兵路途既近且經由噶爾藏多爾濟等各部落諸事可以策應是以此次進兵專賴西

路北路不過遙為聲援哈達哈等應遵朕屢次所  
降諭旨即令達爾黨阿領兵由西路前進哈達哈  
等於北路形勝處駐劄收養馬匹壯軍威而分賊  
勢仍將厄魯特烏梁海等游牧防守以禦逆賊乘  
虛擾亂如阿睦爾撒納掩襲前來則以逸待勞擒  
獲甚易現在達爾黨阿帶往兵一千名北路止留  
兵七千餘名如不足用即著哈達哈於喀爾喀兵  
丁內就近調取再汗哈屯烏梁海等係新附之人



若如所奏於伊等地方採買馬匹或生疑懼郡王  
青滾雜卜深知伊等情形可否採買之處著會同  
酌量商辦如有不便即行停止

命籌辦西路軍營口糧

上諭軍機大臣曰此次進兵伊犁俱由西路進發策  
楞等攜帶口糧不甚充裕進兵後不惟路遠難於  
轉運且沿途亦須防護現在準噶爾地方擾亂互  
相劫奪若令伊等自行搶掠則敵勢轉盛一時難

以勦滅官兵前進之時必須因糧於敵以壯兵力  
則賊勢空虛不難即破而大兵亦可藉飽騰倘尚  
不足或於厄魯特等及噶爾藏多爾濟等部落內  
將口糧牲畜暫為支用事定後運內地緞疋茶葉  
照價還給策楞等相度機宜妥協辦理

命授從征台吉宰桑等官爵

上諭軍機大臣曰厄爾錫音哈薩克錫喇尼瑪吞圖  
布恩克博羅特等已俱命前往西路軍營聽候調

遣厄爾錐音哈薩克錫喇著授為叅贊大臣尼瑪  
授為內大臣兼圖什墨勒仍授為叅贊大臣吞圖  
布恩克博羅特俱著在領隊大臣上行走策楞進  
兵之時扎拉豐阿達爾黨阿在額林哈畢爾噶駐  
劄辦理軍務尼瑪著即在扎拉豐阿處管理臺站  
稽察奸細遇奏事時叅贊大臣等俱著一體列名  
命曉諭諾爾布林沁等擒賊事宜

上諭軍機大臣曰據策楞奏稱諾爾布林沁派出兵

二十名合之現在帶往兵丁共計四千足以勦滅  
阿巴噶斯哈丹等但聞阿巴噶斯等遷往伊犁現  
派索倫兵丁前行哨探大兵暫住烏魯木齊候信  
辦理等語阿巴噶斯哈丹聞我兵前進而台吉諾  
爾布林沁又帶兵會合聞風遠遁遷往伊犁情形  
屬實然伊等帶領戶口勢必不能遠行若由徑路  
發兵堵截必易擒獲倘至伊犁後賊勢會聚轉來  
抗拒亦未可定應曉諭諾爾布林沁等阿巴噶斯

哈丹雖畏威遠去略得安息即將窺竊汝等游牧  
須及時勦滅以杜後患如已入伊犁毋庸過急俟  
噶爾藏多爾濟等到時會同前進方為妥協再策  
楞駐兵烏魯木齊與回人游牧相近或賊人暗生  
奸計誘令回人等不行換給官兵口糧或借換給  
口糧之時乘間擾亂策楞應密行防範至諾爾布  
林沁等宰桑台吉感恩奮勉派兵隨征每兵著賞  
銀三兩以示鼓勵

乙亥

申諭西路速行進兵

上諭軍機大臣曰據達爾黨阿哈達哈等奏稱聞西路大兵一切俱已整備於明歲草萌時再行進發等語此奏甚屬錯誤昨命達爾黨阿領兵前往西路哈達哈留於北路駐劄因北路地勢空曠俱無游牧不若西路之便隨時可以進兵屢經明白傳諭計達爾黨阿領兵至西路時噶爾臧多爾濟等

亦陸續可到一切會同商酌速奏膚功方合機宜  
現在冬令進兵較難人人所知即爾等亦不無所  
見然愈遲緩則賊黨愈固賊力愈強辦理更費周  
章所謂兵貴神速者此也以冬令進兵為難將軍  
大臣尚因此退縮何以鼓士氣而振戎行即如台  
吉沙克都爾曼濟宰桑厄爾錐音等伊部落與伊  
犁密邇今伊犁信息未通伊等尚奮往前進若噶  
爾藏多爾濟之部落業已保護一聞此言勢必退

後又將何以集事此時惟馬匹亟宜籌畫策楞扎  
拉豐阿玉保等即仿照木蘭行圍時向蒙古換馬  
之法通融辦理以疲乏馬匹換易肥壯馬匹酌量  
給以緞疋銀兩此項疲乏之馬善為牧放轉瞬即  
成臆壯是不但無損於彼而且大有裨益噶爾藏  
多爾濟等部落馬匹照此交易諒無不欣然樂從  
且今歲春間進兵阿睦爾撒納屢次陳奏以迅速  
為善瑪木特亦以為然倘我兵緩行前進真不出



叛賊所料而賊愈得以逞其負固抗拒之力矣明  
歲進兵之言西路軍營諸臣並未陳奏達爾黨阿  
等所奏因北路已停止進兵朕是以不行深究若  
達爾黨阿至西路時亦出此言必至搖惑軍心所  
關匪細斷不姑貸現在沙克都爾曼濟厄爾錐音  
等已至西路如何商議進兵之處策楞等速行奏  
聞

命獎賞各台吉宰桑等

上諭軍機大臣曰據策楞等奏諾爾布林沁附近游  
牧等處查出喀爾喀二百三十餘人各台吉宰桑  
等情愿資給口糧送回原處等語衆台吉宰桑等  
輸成効順將衆鄂拓克所有之喀爾喀查出給與  
口糧回至原處辦理甚屬可嘉著策楞酌量將緞  
疋茶葉賞給以示鼓勵再唐古忒查出辦理臺站  
之察哈爾喀爾喀人等即照策楞所奏仍令辦理  
臺站唐古忒亦著獎賞

定西將軍策楞疏奏設立臺站事宜

策楞奏言臣與衆台吉等商定安設臺站之事  
自烏蘭烏蘇至烏魯木齊俱照各鄂拓克分派  
每臺設兵丁十名厄魯特兵十名傳遞事件自  
烏魯木齊以外如遇無游牧處即將伊等帶往  
兵丁存留安設并將坐臺人等每月給銀二兩  
恩旨宣諭衆皆感悅再查此處臺站經將軍班第等  
派出喀爾喀貝子羅卜藏車凌副都統職銜阿

敏道散秩大臣敦多克協理台吉固穆扎卜得  
木齊達什扎卜等管理今惟固穆扎卜達什扎  
卜二員臣令諾爾布林深另派大白吉一員同  
固穆扎卜達什扎卜管理奏入報

聞

丁丑

申諭定西將軍策楞進兵勦賊事宜

上諭軍機大臣曰據策楞奏稱布魯古特台吉諾海

奇濟克呼爾瑞台吉薩喇爾自伊犁前來告稱阿  
睦爾撒納未至伊犁彼地欲內附者甚衆等語看  
來與阿逆黨惡者不過阿巴噶斯哈丹烏勒木濟  
敦多克曼集約蘇圖克什木圖布慎錫克錫爾格  
巴蘇泰等數人即阿逆亦自知伊犁衆心離散疑  
懼未往若於叛賊未至之前速行進兵衆必迎降  
策楞此時想已將阿巴噶斯哈丹部落勦滅賊衆  
自必畏懼其馬匹牲畜分給兵衆以益兵力速即

進兵即可平定噶爾藏多爾濟等陸續將到策楞  
俟其到時會合進兵直入伊犁固屬甚善但時不  
可失惟在相機辦理毋庸過於拘泥賊黨烏勒木  
濟等罪不容誅斷難寬貸即前來投降亦拏解來  
京治罪其戶口人等盡行勦滅以示懲創惟伊犁  
附近有喇嘛六千餘人若一體辦理不但失衆蒙  
古之心其真偽亦無從區別策楞務加體察其實  
係聚衆黨惡者即行誅戮如係威逼相從量從寬

免一切俱遵前旨辦理諾海奇齊克薩喇爾自伊  
犁前來輸誠相告甚屬可嘉昨諾海奇齊克之弟  
琿齊薩喇爾之兄鄂勒椿弟洪郭爾等入覲時已  
施恩俱封為扎薩克台吉今特加恩封諾海奇齊  
克為公薩喇爾為扎薩克頭等台吉伊等果能奮  
勉効力朕必更加恩重賞著策楞傳諭伊等知之

戊寅

諭定邊左副將軍哈達哈等仍派侍衛德善通使哈

薩克

上諭軍機大臣曰前自北路脫出之索倫跟役布顏圖供稱伊主遣往哈薩克現被擒拏看守等語當即傳諭達爾黨阿等訊問布顏圖確供具奏並令將遣往哈薩克之侍衛德善等暫行停止今據策楞奏稱自伊犁前來之呼爾瑞台吉薩喇爾告稱遣往哈薩克之侍衛達勇阿順德訥帶領哈薩克使者同至伊犁哈薩克情願投順等語看來哈薩



克阿布賚甚屬恭順並無可疑著哈達哈等傳諭  
德善等仍遵前旨前往哈薩克並將布顏圖從前  
所供果否實情審明具奏

己卯

命阿玉錫丹津等暫回游牧

上諭軍機大臣曰前因北路進兵令丹津在哨探隊  
行走今已暫行停止丹津在軍前無事著遣回游  
牧令其休息伊游牧距軍營甚近有事即可調遣

卷二十一  
喀喇巴圖魯阿玉錫今年自軍營回來未得休息  
亦著遣回游牧俟有遣用時再行降旨

定議北路採買馬駝事宜

叅贊大臣達爾黨阿等奏言現在軍營兵丁除  
遣往西路外合計九千名再調喀爾喀兵一千  
名共為一萬令於正月內到營所有軍營馬匹  
二萬有餘駝三千餘隻賧分平常俱交於喀爾  
喀各部落牧放俟明春青草發生時選擇應用

此外尚需馬一萬餘匹駝二三千隻擬向喀爾喀遠近各部落採買約於明年二三月內均可購齊並向新收烏梁海等換取馬駝應用以期無悞軍行奏入得

旨軍機大臣議奏尋議前因議定西路進兵是以令哈達哈等領兵一萬名駐劄北路遙為聲援北路雖非西路克期進兵可比但馬駝至明年二三月間始到恐有遲悞現今西路將軍策楞等

已經帶兵前進北路亦應先時預備如需會合  
即時起程原未指定明年進發應令哈達哈等  
於現存馬駝外就近酌撥無庸向喀爾喀四部  
落調取以致稽延時日至採買新收烏梁海等  
馬駝應用之處即遵前奉

諭旨商同郡王青滾雜卜妥協辦理奏入  
上從之

侍郎納穆扎爾疏奏查獲阿睦爾撒納等游牧

馬匹什物

納穆扎爾奏言臣會同侍郎兆惠查得阿睦爾  
撒納班珠爾根敦扎卜等游牧內駝三百九十  
六隻馬一千八百五十三匹烏鎗八十九桿撒  
袋三十九副弓四十一張腰刀二十口長鎗九  
桿鎖子甲一副俱交扎薩克遜都卜送交烏里  
雅蘇台軍營查收其餘什物俱交濟木庫爾宰  
桑等賞給又查得阿睦爾撒納銀一千六百兩

班珠爾銀五十兩

賞班珠爾之甘珠爾經一部佛三尊俱交與領催冲

保解送京師奏入報

聞

庚辰

派直隸各省大員稽查沿途軍營文報

上諭軍機大臣曰軍營文報關係緊要須特派大員

督率稽查方無玩悞直隸著派永寧山西著派富

尼漢陝西著派武忱甘肅著派明德各於所轄境  
地沿途來往督察如有稽延惟伊等是問

命傳

諭薩喇爾擒賊贖罪

上諭軍機大臣曰前自伊犁脫出人等雖稱薩喇爾  
被錫克錫爾格擒獲但非親見適據策楞奏到諾  
海奇齊克等告稱並未見送往伊犁則薩喇爾果  
否被擒尚無實據但伊與將軍等同在伊犁辦事

而惟伊脫逃或自覺無顏與策楞相見潛身遠避亦未可定策楞進兵後加意諮訪尋獲時即傳旨曉諭伊係受恩深重之人雖以脫逃負罪然能帶兵擒獲阿逆即可自蓋前愆已有旨令其仍掌定邊右副將軍印一同進兵惟宜益加奮勉効力贖罪俟尋獲時策楞即速行奏聞

命厄魯特公納噶查偵探阿逆信息

上諭軍機大臣曰前慮阿逆逃竄或投入回人部落



因派納噶查往阿克蘇城等處傳旨擒拏今據諾  
海奇齊克等告稱阿逆尚在博羅塔拉地方居住  
著納噶查前至巴里坤偵探如阿逆未往伊犁而  
策楞已勦滅阿巴噶斯哈丹游牧由彼處直進伊  
犁堵截叛賊投回之路則納噶查不必前往回部  
即往策楞處協同辦事其侍衛哈清阿墨德庫聽  
候策楞調遣官長保將彼處情形詳悉問明回京  
陳奏若策楞雖已勦滅阿巴噶斯等尚候噶爾藏

多爾濟等未入伊犁而阿睦爾撒納已經住據納噶查等應仍往回部遵照前旨辦理

定議撥補馬匹事宜

署陝甘總督方觀承等奏言甘省派調馬二萬匹除挑解軍營一萬三千餘匹及調撥各營外餘馬五千餘匹合陝省未到馬七千餘匹共一萬二千餘匹將賧分好者補足安西肅鎮甘提三標摘缺馬九千匹其賧欠者截補涼寧各營

摘缺馬匹令加緊餵養期於適用滿漢各營摘缺未補者令其即行領銀購補奏入得

旨軍機大臣議奏尋議西路軍營現派官兵約計八千名所有馬匹除哈密解往之五千餘匹及甘省挑解之一萬三千餘匹合計一萬八千餘匹是否有贏無絀應令該署督速行咨詢軍營倘或不敷再行辦理至各營摘缺馬匹雖應按數補足而挑存之馬必須餵養遇有調遣方可應

用况陝省未到馬七千匹未經驗挑臣等酌議  
除安肅甘三標營係近邊要地摘缺九千匹應  
先行補足餵養其涼寧各營道里稍遠所有餘  
馬無庸即行截補統留安西等處分槽飼秣以  
備緩急調撥之需至所奏滿漢各營摘缺未補  
者令領銀購補上緊飭辦則各營馬匹無缺而  
軍營馬匹愈充自應如所奏辦理奏入奉

上諭曰現在調撥陝甘山西各鎮協標營馬匹陸續

解赴軍營所有緊要之營伍驛站自應及時購補足數近據方觀承等奏稱各營摘缺之馬速令購補其已補若干未經奏明著該督撫將軍提鎮等將所屬營驛先後摘缺馬匹已經購補若干速即查明自行具奏嗣後著每月奏聞一次

允達瓦齊致書台吉伯什阿噶什等協擒阿睦爾撒

納

軍機大臣奏言臣納延泰遵

旨傳諭達瓦齊據達瓦齊跪稱我係俘囚蒙

聖主不加誅戮已屬格外

隆恩又蒙

賞賜衣服銀兩現在患病遣醫調治種種

厚恩雖捐糜踵頂不足報効今聞阿睦爾撒納背恩

逃竄苟有人心無不切齒况達瓦齊與伊有讐

恨不能奮身擒獲彼處有都爾伯特台吉伯什

阿噶什及庫本諾雅特台吉諾爾布等數人

尚能事不與叛賊為黨達瓦齊平日素知擬寄  
信伊等令其奮力擒拏阿睦爾撒納明正典刑  
庶足以彰國法而快人心並懇

皇上降旨於諾爾布等伊等自必感激効力懇求代  
為陳奏奏入報

聞

定邊右副將軍扎拉豐阿疏奏領兵由巴里坤  
前赴軍營

壬午

命廣州將軍錫特庫為駐防巴里坤都統馳驛來京  
請訓再赴新任

定西將軍策楞疏奏遣副都統阿敏道前往哨  
探情形

策楞奏言臣遵奉

諭旨令達什達瓦宰桑博羅特會同阿敏道先行進  
兵嗣因博羅特患病臣即向伊揀選識路之人



同阿敏道前進令將克勒特烏魯特等奮力勦  
捕詳悉飭知阿敏道遵行外現因諾爾布林沁  
等游牧甫移未經安頓約臣於十一月初一日  
會齊若令阿敏道帶兵速進恐阿巴噶斯哈丹  
等驚駭逃避是以復行令阿敏道緩行前往俟  
諾爾布林沁到時再將伊兵丁揀選二百名趕  
赴阿敏道同進臣現已至烏蘭布拉克地方俟  
見諾爾布林沁後商同前進奏入報

聞

叅贊大臣達爾黨阿疏奏領兵前往西路軍營

癸未

命封達瓦齊為親王

上諭大學士曰前因準噶爾夷部數年以來篡奪頻仍所屬諸部率衆內嚮接踵而至朕為天下共主既不忍拒而不納將為之經理游牧即因其地處之為久長計而

兩朝未竟之緒亦乘此事機一勞永逸此用兵之本意也至達瓦齊之立為台吉不過外夷自相篡竊原可不必聲罪致討從前所降諭旨甚明但以達瓦齊進貢請安尚居然以噶爾丹策零自處是以降勅切責旋復遣使叩關情詞恭順則大軍已入其境未得至京將軍等取其書奏之及王師進取伊犁伊畏避逃竄亦情理所有是達瓦齊原無獲罪於天朝之處伊之殘酷暴虐亦皆出於阿睦爾撒

納之口迨俘獲來京視之則一庸慙可憫之人耳  
且言久思歸順特以阿睦爾撒納領兵前往實不  
便於其軍前納款此其肝膈本懷非由飾說古者  
異國降王或優以封爵示無外也達瓦齊著加恩  
封為親王賜第京師奉朝請朕撫馭萬國一秉大  
公仁育義正惟聽人之自取可將此宣示達瓦齊  
并曉諭中外知之又

諭曰朕已將達瓦齊宥罪施恩封為親王賜第京師

帶領伊子居住伊舊日屬人著查出四五十戶令  
其來京役使並著策楞曉諭台吉噶爾藏多爾濟  
等及準噶爾人衆從前進兵擒拏達瓦齊止因阿  
睦爾撒納懇其暴戾無狀凌虐準夷朕軫念羣生  
拯救水火是以聲罪致討今拏解來京乃一庸愚  
無用之人即伊種種虐行其初亦皆係阿睦爾撒  
納從中相助非伊一人之罪且達瓦齊原係綽羅  
斯台吉朕憐憫其愚備藩京邸斷不令回至游牧

現在達瓦齊感戴朕恩思圖報効繕寫書信寄伊親信之庫本諾雅特台吉諾爾布都爾伯特台吉伯什阿噶什宰桑約蘇圖策凌多爾濟等令其協擒阿逆以彰國法具見誠悃著策楞即行轉交仍將伊等接到達瓦齊書信後言語情形速行奏聞並傳諭納穆扎爾舒明等將用兵準夷及加恩達瓦齊之處宣諭策凌齊木庫爾等知之

命傳

諭庫本諾雅特台吉諾爾布

上諭諾爾布曰前將軍大臣等戡定準夷汝即望風  
歸順回心向化已傳旨令汝前來入覲俟汝到時  
廣示鴻恩後因阿睦爾撒納負恩逃竄中途間隔  
今朕已施恩達瓦齊備藩京師伊感激朕恩思圖  
報効因汝從前有搶擄阿睦爾撒納游牧之事義  
切同仇達瓦齊又素知汝之為人不與叛賊為黨  
奏請寄書於汝汝能奮勉効力協助大兵擒拏叛


賊朕必重加恩賞

諭定邊右副將軍扎拉豐阿速行進兵

上諭軍機大臣曰據扎拉豐阿奏稱准策楞咨將現在所到馬匹二千趕赴軍營俟陸續解到馬匹後無論兵丁多寡隨即繼進策應等語辦理馬匹固屬緊要但策楞以輕兵深入額林哈畢爾噶勒殺阿巴噶斯哈丹等游牧扎拉豐阿能即將現在所有兵丁迅速前進會同辦理尤為合宜若俟各處



馬匹催齊然後進發則已緩不及事此旨到日量  
扎拉豐阿業已領兵繼進如至彼處策楞又往前  
行扎拉豐阿即駐劄額林哈畢爾噶以作聲援並  
加意督催臺站稽察文報將此詳悉傳諭知之



平定準噶爾方略正編卷二十一